



# Միսաք Մեծարեւնց

## Կյանքի երգը

Ահաբեկիչ կնճիռներուն մեջ կյանքին  
Լալահատաչ, սուր հծծյուններ ինձ ըսին.  
«Ամեն հույսեր մեծ պարապին կը հանգին,  
Ունայնություն մը կը պրկե կյանքը սին:

Ամեն ծաղիկ խամբում մ'ունի իրեն մոտ,  
Ու ամեն կյանք՝ մութ ստվեր մը իր ետին.  
Ծաղիկներու բուրումին պես խնկահոտ  
Ամեն հույսեր դեռ չըծլած կ'անհետին»:

Բայց մխացող խոհերուս մեջ ծիրանի  
Լույս մը հանկարծ սրպրդեցավ շողալով,  
Կյանքի փարփառ երգն ոսկեսար, գեղանի,  
Որուն ցվերջ ունկնդրեցի դողալով:

«Տխուր ողբեր թող չքանդեն քեզ,- ըսավ,-  
Թող չցնդին ոսկի հույսերդ ցիրուցան.  
Իր վերջն ունի ամեն կնճիռ, ամեն ցավ՝  
Չինք մոռցնող ժպիտները լուսացան:

Ահա ի'նչպես, տես, կապույտն ալ կամարին  
Մերթ ամպերու գորշությունով կ'աղարտի,  
Անձրևին տակ իր ժպիտներն կը մարին,

Անձրևին,- այդ լաց,- սակայն երգն է ավարտի:

Ամեն անձրև արև մ'ունի իրմեն վերջ,  
Ինչպես ամեն լաց իր ժպիտն արփենի.  
Ու տևական ուրախություն մը միշտ պերճ  
Պի՛տ հաջորդե ժպիտներուն երբեմնի»:

1903, հունվար